

淳

熙

稿

一



淳

熙

稿

二



淳

熙

稿

三



淳

熙

稿

一

趙
蕃
撰

中
華
書
局

淳

熙

稿

二

趙蕃撰

中華書局

淳

熙

稿

三

趙
蕃
撰

中
華
書
局

叢書集成初編

淳熙稿 三冊

中華書局出版發行

(北京王府井大街三十六號)

秦皇島市資料印刷廠印刷
一九八五年北京新一版

開本：七八七乘一〇九二毫米 三十二分之一
統一書號：一七〇一八·一五一

淳熙稿卷一

宋 趙 蕃 撰

四言詩

碧雲三章并序

碧雲、思親友也。孫鄭暨徐期以入山，既期而愆，聊發我言。
碧雲散舒，合且復離。皓月湧照，圓而不虧。嗟我所期，曷云不來。
翳翳村巷，遙遙犬聲。肅肅庭樹，啾啾鳥鳴。所期不來，實關我情。
寒鐙既張，幽室有光。豈無他人，惟子之良。閉彼柴荆，今夕斯長。

三月十三日夜，五更聞杜鵑，時成父欲入浙，因賦六章，章四句，以送之。
不如歸去，蒼山茂樹。獨胡爲乎，空此號謫。
歸去來兮，斯言可師。我今已歸，胡能不知。
不如歸去，春且云暮。山中之樂，豈同歧路。
歸去來兮，言發動隨。古之逸民，舍陶而誰。

不如歸去。載丁載寧。勸子勿去。子寧我聽。
不如歸去。子寧肯住。歸去來兮。早歌式微。

山行見月作四首

有風肅然。落於樹顛。使我沈痾。不藥而痊。
意行何之。陟此雲嶺。如夢而覺。如昏而醒。
東坡老翁。有言莫酬。涼天佳月。卽爲中秋。
恨我無酒。負爾一醉。酌茲寒泉。兀爾忘睡。

五言古詩

古意二首

齊王昔好竿。有客工鼓瑟。持之立王門。三年不得入。不知所好異。卒致遭怒叱。我今幸早計。歸去無自逸。
曾聞蜀道難。難於上青天。蜀道難何似。嵯峨劍門關。未抵鄱陽湖。無風浪掀船。脫身其早歸。無汗蛟鰓涎。

擬古

松柏抱奇姿。自應能歲寒。離菊蓋小草。後雕良獨難。誰云一時芳。願將比春蘭。蘭開桃李際。菊傲風霜闌。
呈尤運使袤延之五首

往者江次對，不妄出薦口。門無雜還賓，麟角龜肋九。斯文獨許公，是謂言可否。幾年闕通謁，今乃獲拜手。今時使者中，所進非一律。學術用其長，公獨名副實。江左更江右，非爲循更迭。政以歲方艱，當遣德星出。少年見公文，大類韓退之。集古一千卷，復楷歐少師。楷歐亦類韓，萬頃定涉瀾。於今到收斂，寧易窺涖涯。翰墨有先達，知己僅三數。省齋憐其貧，晦庵過其譽。懷哉介庵老，先我騎鯨去。公如幸教之，豈歎歲不與。青衿詩學爲，白髮步乃卻。茫茫悟中入，了了難邊覺。抱病每向人，誰有如神藥。公乎有異聞，斷爲啓玄鑰。

常州先生以太守入對五首

皇皇畿甸符，郁郁容臺禮。固殊彼奏召，有待今沃啟。上能格君心，次可裨國體。俗吏急簿書，細務紛驅米。爭觀蘇翰林，未識李北海。獨能親話言，異彼想風采。傍徨計相烏，留滯塞蘭茝。五馬候南還，輕舟卽東匯。一州固匪輕，四海豈不重。與其事扶疎，孰若深培壅。驥不取德稱，馬多求駕要。偉哉底柱功，障彼百川洶。青氈非舊物，喬木豈故國。家傳墨莊書，人嗣文靖德。欲知治興衰，是繫道滋熄。愚獨愧衣冠，自宜親稼穡。姑蘇訪虎邱，西庵作清遊。能談著書人，老僧非黑頭。義興望荆溪，景坡亦前修。不能乘桴者，滄波沒白鷗。西庵有僧·猶及和靖解孟子諸事·潘友恭云·景坡堂·蔣宜卿所築·

送趙叔自吏部知福州四首

當年治安策，通達如賈誼。汲黯不留內，似非朝廷美。得非蕭望之，政事要詳試。兩州已有聲，刺史還連帥。

人從閩中來，盡道閩中樂。舊穀既年豐，今雨還時若。公行亦何事，重赴三山約。我乃願從之，微官還見縛。公雖去朝廷，祕殿通班在。不應獻納忠，於爾分內外。而况我此州，甘棠存蔽芾。旱疫苦相仍，要當蒙大賚。憶昨過辭公，去有湖外役。遲遲未能去，乃此困艱食。湖外米雖賤，早歲賈者多。賈多米必貴，吾飢其奈何。

呈陸嚴州五首

江山不因人，何以相發揮。人而非江山，興亦無所歸。是故新定郡，得公倍光輝。豈惟江山然，鷗鳥亦依依。簿領古白下，檄書走臨川。陳詩道所懷，奈此巍巍然。臨分得聞見，語以故有連。此意亦厚矣，乖離今十年。會稽巖壑林，新定山水藪。一焉喚來居，一焉煩出守。人言公未遇，我獨以爲不得失。彼此閒於茲，分薄厚。一代文翰主，百年風月懷。於今則所獨，視古良與偕。試評雲霧窗，孰與山水齋。況我方與嚴，身沈名不埋。往游金陵都，始攀石湖仙。爲我談公詩，大雅後有焉。謂我欠公詩，勉哉成其天。此語久不理，今朝墮公前。聞克齋舅氏除江東提舉，以此寄賀。

春風桃李花，開落幾許時。諒彼松柏質，動有千歲期。舅氏早負名，不作窈窕姿。冰霜飽摧剝，未覺明堂遲。小休未兩幡，四牡已載馳。斂散有常度，刺舉由我施。過家得上冢，偃薄寧久爲。又意漢廷上，鼓舞須厥辭。文章豈憎命，窮人詎因時。賤子盍自勉，毋庸罪毛錐。

寄賀周子充除左相留正除右相王謙仲除參政

清熙十六年正月十九日。雪餘雨更作。有客方抱疾。忽傳底處書。昏暮叩蓬華。問之何許人。乃是吾家姪。書中道何爲。除日報甲乙。要令二父知。此意深所悉。我方盤谷歸。詎應聞黜陟。雖云在田野。又可忘輔弼。況於鄉里賢。與夫舊連率。及其先友家。投分亦頗密。恭惟三君子。德盛難具述。要皆由從官。以至秉政筆。于今天下事。孰得復孰失。仰思與夜繼。想不遑暇逸。置郵速傳命。頌口當四出。而我病不能。欲置還未畢。要歌夔皋詩。稱美寧敢溢。願觀勳業成。公論斯可必。曾聞烏鳴春。氣應還唧唧。喜甚屢且折。憂深緯寧恤。子暢尉曹。秩滿侍親。攝戶掾於上饒。賦詩二首以送之。

遊君父子間。情誼等骨肉。那知三年度。但謂一日足。今晨復何事。溪頭有行舳。臨別慘莫言。徘徊謾瞻矚。平生幾游居。有親亦有故。一飯或相忘。素書不能屢。心知世情薄。但益古人慕。如君父子賢。百蓋一二數。寄曾運使

知名必曹劉。乃可暗中索。無聞若我曹。過眼誰復憶。如何十年後。姓名猶見識。當時所陳詩。亦復能道說。豈我能致然。先生自爲德。維時歲云莫。歸路千山隔。見公不三四。身已限南北。迨茲去無由。乃悔來卒迫。況今落蠻夷。公且天咫尺。猶擬信州船。看竹茶山宅。

謝王使君

臥痾衡茅下。誰顧疾作門。忽傳故人書。犬吠雞爭喧。書陳使君賢。有好罔不悼。念子藥物須。萬錢致深恩。

我未謁使君。此饋曷見存。是風久寂寥。當於古人論。亟起欲下拜。輾轉足但捫。事殊送酒家。孤負老瓦盆。食粥已數月。政類顏平原。呼僮糴新粳。洗甑汲井渾。鄰蔬價不二。取足充盤飧。豈止飽妻孥。自可留弟昆。聊寬口腹累。姑置襦袴溫。惟我困流落。寄迹無田園。東南數十州。遍走如乞墦。今者屬有役。病縛不得犇。幾思出入勞。復慮霜雪繁。使君儻加惠。茲又何足言。屢將入城府。跼蹐駒在轅。因風道感謝。情至筆載援。送劉得華赴漢陽教授二首。

昔公去太學。士曰奪我師。今公去皇閣。里閭極公思。公何德於人。曰公勇於義。使其用於時。其效何止是。漢陽在何許。越在河之北。聖朝富文物。要使均萬國。輟我學省彥。以爲遠方重。化成亟歸來。明堂待梁棟。席上奉呈歐陽教授。時併餞戴兄。故其中及之。

良由姿不敏。所以須朋友。朋友多得人。不忍相瑕垢。萬安初經過。渝水重邂逅。君今分教來。我政官曹守。何期逃虛中。乃值平生舊。疊山雖云荒。疊水亦頗秀。功名漢將餘。草木騷人後。春園縱芳歇。夏屋屬陰茂。官池荷卷舒。野寺泉波驟。追隨方自茲。留落復何有。合者故慰心。離者頻回首。聊歌五字詩。以侑一杯酒。送施教授

盛心蓋俗忘。姦聲其道傷。摻別伊何吟。停杯慨以慷。君官上饒郡。分教明虞唐。俄而及瓜代。朝天架康莊。巖廊冠劍地。學省翰墨場。失人易揣摩。失己勞酌量。情融香梅葩。玉水春茫茫。鴻毛遇順風。市朝在錢塘。

送彭孚先赴辰州教授

因行碧湘門。倏念黃草尾。曩辭戴安道。同者歐陽子。那知三年過。僅謂一日爾。惟辰雖陋邦。分教多名士。前瞻固高明。後至復奇偉。天將惠其俗。賢者不自鄙。流傳幾人說。邂逅一見喜。談論未云終。別袂已復起。勿謂隔沅湘。因來致蘭芷。

送梁仁伯赴江陵承三首

往者左司公。會作荊州牧。君時雖從行。所志惟誦讀。今焉去爲吏。與昔當異躅。試以身所經。參之耳曾熟。直道多不容。枉道夫豈可。直道誠忤人。枉道還喪我。如君直有餘。爲計亦多左。而我枉未能。若爲逃轆轤。君寧澧之蘭。我擷沅之茝。邂逅桃花源。一笑若相待。那知青草湖。追隨復連載。南浦問何邊。冰谿復安在。挽宋柳州授

少陵在大歷。浩翁在元祐。相去幾百載。合若出一手。流傳到徐洪。繼起鳴江右。遂令風雅作。千載亡遺究。猗歟宋柳州。有志諸公後。作詩匪雕琢。氣□先忠厚。銳鋒深自斂。至寶不輕售。行年且半百。纔爲嶠南守。嶠南山水佳。中州未曾有。慨然遠游意。不憚萬里走。下車甫葺年。已上政成奏。無何天作孽。一病藥莫採。跼壽回乃天。天理果大謬。諸郎有家法。處已知孝友。崎嶇窮川陸。寓郡還公匱。卜龜得安宅。厥後斯雲覆。自憐蹤迹脫。敢敘親且舊。作詩寫餘哀。清淚空如霽。

讀呂益卿所寄詩編明日四月一日也。

舊雨連今雨。空庭斷行跡。有時出門看。平湖四無壁。忽傳何處書。令我喜折屐。新知呂夫子。寄我詩滿冊。是時羊牛下。攜之就簷隙。首披山居賦。奇字多莫識。徐徐見關鍵。坦若由戶出。定師離騷經。不人相如室。秋懷似選詩。法嚴仍事實。白沙龍陽作。如杜紀行役。卒至同谷吟。三讀淚橫臆。君何知之晚。今古蓋一律。兒曹苦問爺。何事爾不懌。徑臥忘解衣。中夜猶太息。曉窗啼鳩喧。今日復何日。和以扶疎篇。吾駁真可叱。夢趙文鼎書寄斯遠。

我不見君死。直疑君固生。賦詩無所寄。始復爲失聲。雞窗已三號。不但當既鳴。恍云秋之中。取酒相與傾。坐有饋生魚。歡言事煎烹。飲我謂杯小。何翅一再行。落月落未落。猶疑見鮮明。已焉覺夢爾。起坐神未平。滄波渺萬里。底處尋騎鯨。悵望莫子語。徘徊空思盈。

重陽近矣。風雨驟至。誦邠老滿城風雨近重陽句。輒爲一章。書呈教授沅陵。

好詩不在多。自足傳不朽。池塘生春草。餘句世無取。詩家黃州潘。蘇黃逮師友。六義極淵源。一貫相授受。秋風有奇思。簞瓢忘巷陋。奈何催租人。敗之不使就。我謂此七字。已敵三千首。政使無敗者。意盡終難又。縱令葺成章。未免加釘餽。衣錦欲尙綱。何嘗炫文繡。一洗凡馬空。浪說充天廐。重陽晴則已。雨必風在口。今茲季月來。陰雨變時候。悵悵爵羅門。寂寂鳥噪牖。黃花冷未芳。黃葉埽復有。頗將寫吾懷。渠在那出手。

併想東籬人。瞻前忽焉後。

重賦畏知寓齋

君昔少年日起家官帝城。諸公盛稱許。往往動得名。夷途一步趨。可到公與卿。永懷松柏堅。高謝桃李榮。謚齋適曰漸。毫髮無妄行。惟時尹夫子。猶躬南山耕。是公妙言語。一字與不輕。銘能爲君述。君志益以明。蹉跎纔幾何。白髮殆數莖。低回尙前銜。牢落方南征。瀟湘清絕地。屈賈放逐情。感今重惻古。慨嘆識此生。究竟漸之義。顧未忘蘗萌。彼哉少年事。老矣夫何營。徹之易以寓。俯夢仰輒驚。何止官爲客。身悟浮雲更。南軒子張子。好學如元成。奮然吐長句。真覺萬戶輕。尹張志則異。與君盡同盟。見君極空洞。不比小器盈。嗣宗絕臧否。白眼常若瞋。司馬萬事好。是中差自宏。看君接物際。二士蓋熟評。君今家山居。扁榜猶在桁。傍陳漆園書。立參輿倚衡。因茲大有得。居窮亦如亨。嗟我道學晚。頗困塵網纓。性又多忤物。舉足逢溝阬。誓將過君齋。指南問初程。但恐持寸莛。莫致洪鐘鳴。

有懷子肅讀其詩卷因成數語

退之以文鳴。餘事尤長詩。名家賈孟流。未必踰於斯。淵明工五言。亦有歸來辭。迺知意到處。百發無一虧。孫侯絕人才。詩文俱中規。究其所源流。蓋匪一日基。有如審言門。遂至杜拾遺。餘波被芝蘭。同功有埴簔。嗟予晚聞道。未易等級推。劇談每從容。瞠若莫可追。閒窗念從公。兩脚如縶維。探囊獲新句。亦足慰所思。

將謁介庵、以詩先之。

溪山故無盡。隨取隨以足。平生笑賀賢。勅賜鏡湖曲。今代介庵老。未歸先築屋。一區占何地。琵琶欣在目。是洲出誰氏。詩自隨州續。當年名絕唱。今也安可獨。溪如益鬱環。山爲增隱伏。以知得所託。水潤由韞玉。一朝起乘傳。屢疏乞祠祿。俞晉落天上。行裝不待束。還家謝溪山。拄杖巾一幅。開堂會賓友。快語瀉鄙醜。我時得得來。奉屢期追逐。維摩適示病。對客倦冠服。悠然失前瞻。重詣規再卜。尺書往問訊。勞公手親復。愛我誨我至。敬拜不敢瀆。自憐生無資。是役尤僕僕。驥駒豈忘遠。歸棹戒已宿。但乞老先生。一言壯空麓。

書田中問、示成父。

每逢田中來。必問田中事。言者爲蹙額。聽者爲酸鼻。皆云水節愆。所以陂修廢。田栽未曾了。旱勢已復至。承天無可說。有淀亦將既。早禾以日論。晚禾尙月計。餓孳已五六。疫死又三四。自茲儻無雨。何以能卒歲。詩成道危苦。示爾應歎歎。

送逸遠歸上饒赴試

謂汝可勿去。汝去意已堅。念欲終不遣。汝請倍諄然。平時父母傍。一事略不與。及今身自行。凡百誰汝護。况當苦炎熱。道遠不可說。晚須背斜陽。曉要踏踐月。墟落乃可爾。陂湖深戒之。藥物務頻進。章馬勿過疲。得失渠有命。勉旃非日競。汝解事文科。吾其老三徑。汝歸見吾友。見叔仍見舅。爲道糠覈肥。無奈相思瘦。